

樊

山

集

自有高歌動鬼神
樊英才調信無倫
誰言北地多浮響
未許東川說替人
一入蓬萊依日月
七傳弓劍照麒麟
如今小試神明宰
種稻公田為養親

題

雲門吾弟子 韃齋詩集時將

出宰宜川 甲申二月晦慈銘

雲白詩得力於信陽而愈於北地其七律至造
韃唐之東川養山而古體殊之

敘

吾師樊山先生宰渭南之明年裒集所爲詩古
刷郵示誠格而命爲之敘誠格何敢敘先生集
加有姻連備知先生師友淵源及出處大略用
昔歲丙午太翁官宜昌遊擊先生生於官舍兒時不好弄恆
於室中獨步且行且語或窺之卽止咸豐初太翁官廣西道
爲賊梗眷屬留長沙久之乃達故九歲始入塾然未授讀以
前已能辨四聲竊觀諸小說與兄姊講說不倦人稱奇童十
一歲能詩十三學經義太翁卽於是歲罷官待勘者又二年
貧不能延師先生與兄劄齋自相師友年十六太翁盡室遷
宜昌先生兄弟仍鍵戶讀太翁日坐齋中督課屬文每數行
必取閱閱必數數訶罵蓋望之過深也而文亦因是益進試

輒冠其曹先後典郡者皆爲延譽丁卯舉於鄉而家益貧先是太翁歸有衣裘數笥斥賣略盡併太夫人釵珥缺焉先生既鄉舉卽爲人司書記博菽水資會南皮張先生視學至宜昌見先生文奇賞之招致賓座又薦爲潛江院長先生雖天資高異而已已歲以前無書可讀見南皮後始知學問門徑南皮亦奇其敏惠盡以所學授之故先生存稿斷自庚午猶宋人以見黃名集云是歲兄訶齋卒徐太夫人慟甚恆不許先生出而不出又無以爲養故歲嘗數出數歸誠格嘗見先生潛江家乘仿山谷宜州家乘每日薪蔬不過三十錢性不肉食食或不托數枚或湯餅一器取諸市肆併爨火省焉而盡以所獲奉親舍徐太夫人知先生好書每持館金歸必撿數金畀之曰爾且可買書如是者十年丁丑成進士始稍裕焉先生

無他嗜好以文字友朋爲性命丁卯南皮典浙試得士最盛
先生館南皮久故與浙士最親辛未見會稽李先生深相慕
結及丙子夏課遂與陶子珍仲彝昆季俱受業焉李先生嘗
曰吾與子珍雲門所爲樂府天下無雙先生驚謝李先生歎
曰得失寸心知子自視甯不佳耶先生自居潛江又移主江
陵講席日夕肆力於古所爲詩文稿草歲嘗逾寸旋作旋棄
如剝筍籜如斷蔗杓自漢及今名篇俊句手所甄錄者不下
數十卷蓋於此事獨得聖解益以精思博學手熟心虛故其
所作稱心而出如人人意中所欲言而實人人所不能言丁
丑通籍南皮自蜀還京與先生別且久相見歎曰子其終爲
文人乎事有其大且遠者而日以風雅自命孤吾望矣先生
皇然請業盡屏所爲詞章之學非有用之書不觀南皮與先

生故皆好談至是談益劇達晝夜不止相與上下千古舉凡時政得失之由中外強弱之形人才消長之數每舉一事必往復再三窮其原始究其終極所著廣雅堂問答一卷卽當日疏記者也已卯冬以散館入都時俄事方棘言者蠶起先生亦有所論列當軸弗善也試列二名與湖南孫宗錫相次孫在湘序第四先生在鄂第三已而孫得館職先生竟改外時清流方盛南皮爲之盟主廣雅堂中戶屢恆滿先生雅不欲附和南皮疑其稍持異同故薦剡不及先生無悶也會以外艱歸遂有高尙之志服闋久不出太夫人促之乃起既謁選得陝之宜川令抵任七月而調居省邑不三歲又以禮去官貫筑黃先生南皮督部爭延致之己丑秋徑吳如廣尋復從南皮還鄂南皮高掌遠躡舉措非常初以先生弗嫻西

學清談而已久之稍與謀議乃大歎挹謂族子樞曰雲門智數過人真幕府才惜吾不能留耳服闋還秦授渭南令其爲政尙嚴而宅心平恕所遇大吏皆推誠相與故得自行其志貧賤日久閱歷世故三十餘年其於物態詭隨情偽百變無不揣摩已熟又上自節鎮下至令長出入賓幕更事最多故尤達於吏治少時好聽人折獄無當意者嘗曰使吾操丹筆從事故當與此輩小異至是果符曩言每聽訟千人聚觀遇樸訥者代白其意適得其所欲言其桀黠善辯以訟累人者一經抉摘洞中竅要皆駭汗俯伏不得盡其詞乃從容判決使人人快意而止故先生所至良懦懷恩豪強屏息而於家庭衅嫌鄉鄰爭鬪及一切細故涉訟者尤能指斥幽隱反覆詳說科其罪而又白其可原之情直其事而又撻其自取之

咎聽者駭服以爲訶察而得實則熟於世情長於鈞較因此
識彼聞一知十故凡所伴揣無不奇中每行縣一馬一僕裹
糧往反不費民間一錢其治盜皆身自捕逐立就擒縛嘗謂
人曰作吏最苦臨事實速若晝寢夜宴奇權於人其所亡失
不知凡幾矣其再出也名益高才益練世以方面期之而
先生殊無進取意蓋自其少時已蓄遠志負幹略視碌碌者
無足比數中道外廷黜爲外吏而同時應舉之士置身清要
擁旄持節者殆非一人自以門望才地全不後人而沈滯若
此意忽忽不樂又十餘年而向之享盛名居邇列者或仕路
顛隳或中年玉折繁華如夢轉轂不恆以先生視之猶爲身
名俱泰則又有齊彭殤一貴賤之意以故四十以後滑稽玩
世忘情得失然性韻剛流出言務盡世亦以此忌之居京師

時不詣人客至不見亦不答拜人目爲狂然嘗語誠格曰李會稽譚復堂吾之師也同輩中若孫仲容王芾卿沈子培當在師友之間其虛心如此少與陶子珍齊名人稱陶樊晚又與袁爽秋齊名稱袁樊云貴筑先生居蓮池爲後進標準臧否人物瑕瑜不掩獨於先生無間瑞安黃先生清聲義問舉朝敬憚獨折輩行與交官副都時以先生不樂衣冠之會特屏騶從至酒肆祖餞焉關中同官涂少卿江西宿士嘗謂同門田生日子之師奇男子也自弱冠至四十不御內者十七年此豈易到耶湘人趙元臣者善相人先生詣之一見歎曰終身不得志也先生謾曰吾甯窮餓死耶趙曰非也他人求之不得者子得之皆若不足是甯有滿志時耶先生以爲知言有日者謂先生權極重當秉戎節誠格私問鄉人之善言

命者則曰非也階不過四品所謂權重者譬如數人共事必
彼一人戶之人常逸而彼常勞彼常發謀而人常退聽此爲
權重耳先生亦以爲知言二十許時卽好聚書侵尋三十年
所得二十餘萬卷而書畫碑帖之屬又十餘巨篋闔內目爲
收藏家先生嘗曰意不能無所寄聲色服玩非性所者此事
差以自娛若值攻取之場赴功名之會視棄此物猶敝屣耳
吾寧作虎頭癡哉誠格所知聞者如此今此刻集亦猶蓄書
畫之意云光緒二十年歲次甲午秋七月受業余誠格謹敘

樊山詩集叙

武威樊君次其近詩曰關中集者一卷曰東歸集者一卷曰
轉蓬集者一卷徵言于余君累世將門至君用文學著入翰
林以上書劾貴臣出爲長安令學識英博倜儻有奇氣詩則
調采蔥蒨音韻鏗鏘使人味之不倦自言初涉温李後溯劉
白於此事頗具甘苦余玩其名篇以情經文以辭緯理殆兼
取四家之長而不囿於四家者也昌黎稱樊紹述三世以軍
謀堪將帥策上第紹述無所不學海涵地負放恣橫從不煩
繩削而自合然紹述文字晦澀不副昌黎所稱若君其足當
之與君方再入秦於其行也叙而歸之

光緒十有六年庚寅十月豐潤張佩綸識

錄

夫許身稷契杜老別有悲愉侈口應鏘王門不談聲病是以
搗藻無益於殿最雕蟲見嗤於壯夫倅然百年之軀曷哉于
載之想將以圖徽鐘萬於伐杵孟鯁鯁焉開麟閣以賞詩長
騷壇而門均噫其瑣已若夫清切之選宏達爲羣倅直承明
紉書中祕以文字供奉雅稱冰銜其篇什流傳最嫻宮體光
題私集冠以經進之章陪預盛游紀之賡訓之作摹績日月
彤鏤雲霞固其職也至於三館迴翔之地厥有兩臺獻納之
司彙聽與桓典相逢鳴鳳爲韓瑗繼起大雅小雅本主文誦
諫之材左貂右貂並載筆論思之彥抱封章以入告芻言采
於風謠然疏草而不傳蓋個形諸篇翰斯亦發摠助裒曾益
榮譽者焉如其靳之於密清勞之以繇屑鳳鸞任其飄泊難

驚競其嗚呼卽不必張詞臣以神仙詆縣令爲畜道幽喬徑
絕汶察流歧謬爲過當之評藉作不平之喟然而司空城旦
編排決事之書列宿耶官檢點理人之譜簿書填委則吟情
有妨伍伯喧呶而哦興爲敗故累年眠蝨豈宜紛志於儀毫
矧歧路亡羊抑且均尤於挾策若然迺有異乎樊山君之爲
詩矣君邁俗聲姿出羣行止以儒用俠不仙亦豪當其席褒
鄂勛門踐嚴徐邇列闕篇日試儒生稽古之榮短疏風聞庶
士傳言之例才儷揚馬見者詫爲入洛之長離性侔夷魚談
者慶爲生庭之屈軼斯非第對命書思之任亦將爲拾遺補
闕之資乃廚顧久厠清流而蘇晁旋補外吏長驅薄笨醉中
竟出國門遠戀柁棧夢裏猷爭王室維時都下英賢星聚儁
又雲從脩載贄之禮文筮盍蓂之卦義斗山宗印錚錚氣節

之倫風雨懷思落落性情之契固宜驅染豪素陶浴襟靈拔
爾抑塞磊落之才寫其悱惻芬芳之致謠詠未闕流播寶繁
洎乎出典方隅量移首創以洛陽之疆項爲彭澤之折腰如
山之訟牒朝來似火之官符夕下將應接其不暇羌歎訝而
自如呼燈招賓佐聯吟削藁責史胥代繕奔馳未息誦聲起
於車端批判將停吟料書其牘背此事未嘗豢廢使君固自
不凡爰自入都之年迄於宰涓之日哀錄茂製付之手民敦
索謫言弁諸首簡卓哉芬林之別趣簪海之巨觀也已絜白
太傅之故居實陸大蓬之封邑名集故同乎承祐得詩乃過
於樂天則嘗究其肆力之劬闕其寄懷之遠不取諸俗子而
劇忱逾工莫看作詩人而呻吟豈妄其講律於七言最細斯
成章較諸體尤多藁雖乘於丁未以前篇莫當於戊申而下

無后村之四韻洵南渡之大宗循覽茲編亦沿斯例七律夥於五律古詩儉於今詩幾疑半格之體裁煞費十年之精力暇時理董何妨享以千金別本孤行奚僅嘗其一嚮獨惜如鄙人者吏才既乏均語未諳本非入粗入細之能焉有可宮可商之技僕將學步恨子固誠不能詩君乃耆痲命士安謬爲作序此筆三復主臣而已光緒十有九年先立冬三日南通州顧曾烜

樊山集卷一

恩施樊增

雲門初集上

起庚午
訖癸酉

東溪詩

併序

出宜昌東郭二里而近有溪曰綠蘿林木茂密水清
見底枕溪而居者數十家余嘗有卜居之志因仿右
丞韜川詩體以見意云

由來賢達士愛水甚於山家室與鷗鳥悠然明鏡閒

買地依蕭寺青牛識故阡斷碑苔蝕字猶記道光年

道光閒
先曾大

父權厝
於此

衡門藪相望北郭丈人家

謂鍾
七丈

每歲逢春雨來看玉茗花

繁杏落如雨故人期不來小奴將竹帚三徑掃花開

板閣依林杪，清朝玩物華。東鄰垂髮女，和露摘溪花。
手種緋桃樹，何緣結子慵。裙襪竹燈挂，親與嫁東風。
玉雪五歲兒，嬌索梁間燕。爲買紙鳶來，更與續麻線。
芳林梅子熟，窗格換新紗。一夜菰蒲雨，朝來處處蛙。
歲收千石藕，蓮實每論斤。荷葉香如霧，帷中臥亦聞。
匣中一尺硯，就持荷葉洗。幽人著書墨，濺着青魚尾。
舉網得雙魚，貫鯁行自語。本藉溪水活，更就溪水煮。
鄰翁知不飲，具飯呼我食。澹墨鱠鮮鱗，生黃煮新粟。
觸熱何處來，箕踞蔭高樹。瓦鼎煮砂泉，且可喫茶去。
小圃富菊花，自汲秋泉澆。溪南幾尺山，綽約東籬外。
萬木封條後，孤松絢晚晴。東峰受佳雪，一朵玉蓮明。
大道通京洛，輪蹄早暮催。五更鈴馱響，莫放過溪來。

溪南多
茶肆

溪水狹於溝蘭舟不可御十千買沙棠牽着岸上住
溪水無大魚田間無華屋結構小家詩閉門幽趣足
盛服趨龍尾高門竦戟牙何如弄煙水草屨自撈鰕
得似灑西否能過朝日無宣城槌熟紙閒寫草堂圖

舟次漢上寄家兄福門

挂席竟西去蒼茫落照閒寒鐘澗口寺殘雪郢門山長大詣
家事飢驅損鬢顏鵝鵝原上草心爲兩人殷

奉和張孝達師官署草木詩十二首

桂

伊昔陟桂嶺鬱鬱多靈根吾楚實炎德灌生亦易蕃前與試
廊接旁與幸舍鄰秋風動池閣九里揚清芬豈不慕芳烈採
掇一何頻修條作清供卑枝析爲薪託根明月中斤斧皆爲

思寂寂生山阿偃蹇誰與論

梧桐

修桐植金井青條何森森朝暉射楹角硯席生綠陰含風試
春乳溜雨知秋心日出讀我書月出彈我琴雖無嶧陽質時
聞鸞鳳音斥鷃隨其後棲條能勿慚

藤

山巢壽百年巨於小兒臂幕懸滿四隅虛空湧幢蓋鬱爲蛟
蛇走紛若瓔珞墜中間有橫木淋炙日以壤纖條引彌長朝
夕暈蒼翠乃知根蒂深風霜有不害取士于其本勿爲採蕭
艾

蘭

幽蘭生澤中菡桂同一芳縹葉汎清露紫莖媚春陽美人乘

貞淑居幽側以傷一朝事君子服御生輝光緬彼屈大夫靈
修無日忘常恐歲遲莫零落隨秋霜願言作君佩置之貢玉
堂

桃

藝桃始尺餘經歲能作花春來破紅萼意態何天斜風日劇
暄美豐肌瑩朝霞公門產嘉植零露紛天葩裁爲綃與錦亦
足羞蓬麻有實况可殺勿徒悅春華

紫荆

牆隅一紫荆明麗勝霞雪我屋當花下摩挲作光悅人亦念
本根花亦愛枝葉一朝嬰刀鋸駢枝忍分裂伊余有寡兄忽
爲霜露折此物兆摧敗理若相糾結草木亦有心落英似啼
血

竹

西隅治精舍列構緣山根蘭橑清夏氣桂館洗秋氛當軒種
美竹娟冷如幽人虛中表貞幹通理舒浮筠鳳皇去阿闕行
辭湘水濱卻顧青琅玕裊裊達夕晨棲條莫如舊居室莫如
新逝當報平安曷云忘此君

蠟梅

物生有真面虛名慎勿竊真蠟視銷嶺相去亦遼闊亭亭粟
玉姿先春表芳烈空山試獨立亦足凌霜雪云何附同姓甘
芳工媚悅漫希鼎鉉榮君子固不屑

何首烏

田兒服交藤五十始生子其孫壽百年元髮亦未改公意頗
信之靈苗極珍視植根肖人狀尺餘略具禮鬢素可立變淹

沈亦徐起願公飲上藥保嗇及神理黑頭當作公地黃何足
餌

構

山田久不治往往生桑穀說苑紀異名辨白不同族似蒿爲
惡菜異檀稱善木何哉杞梓林育此不祥物熟槌以代蠶儉
陋本夷俗志士恥息陰而况爲衣服我欲蕃嘉卉豈能已斤
刷周任昔有言芟夷固非酷

雜草木二首

廣庭布雜卉韶靚悅人目籬角明秋暉娟娟媚幽獨質弱不
自任交藤蔓黃竹眷此顏色好幾忘霜露酷日夕寒風來枯
蓼已盈東青帝豈無恩感時自搖落

洛下數耜紅廣陵美金帶知名自宿昔其氣益驕貴秋華被

百草卑溼伍叢箐朝夕蒙汎泉摘英勝雕績乃知處渴澤恩
稀感必倍下品用寒門立功逾貴介

上妻大父彭

崧毓

于蕃師

烏角歸來詠反騷生祠溟海尙絃匏民間生子都名賈塞上
降人願姓包節度林吳知國士舊姻黃鄧總神交碧雞兵事
如天遠且築溪堂蓋白茆

歸權湘中又鄂中連年講席寄河東身如梁氏夫妻隱文比
蘇家父子工四品解龜滕白父子巖採藥夏黃公江南花月
無顏色正要人間著放翁

長春觀題壁

閒訪玉清家因逢蔡少霞巖巢紅蝙蝠鼎鍊白硃砂進食饒
甘果留賓更苦茶求觀放生鹿觸損短籬花

鶴樓題壁

相公崇武不崇文總爲朝家用舊勳莫作溫郎輕薄語中書省裏坐將軍

趙子昂畫馬并序

馬凡七匹圉人一絹已黯壞而生氣湧出家藏餘三十年壬戌歲除以畫乞葬陵富人得錢萬二千暇日追憶爲此詩也

王孫畫馬世所稀直幅竇若兼金貽絹素朽落五百載懸牆突見生駒驪日中就視乃能辨照映水草光離離一馬拗怒就銜轡意態早與風颺馳圉人磔鬣露兩肘天寒袴褶圍黃皮旁立兩馬亦馴異昂首髣髴聞鳴嘶其餘肥瘠各有態滾塵齧草皆權奇世間凡骨斷無此毋乃上廐飛龍姿傷心玉

馬朝周日虜騎橫江天水碧學士傳宣入上都天階立仗心
魂慄瑤池八駿那可逢披圖宛見沙漠風北邊健兒善游牧
形貌真與圖畫同王孫畫馬能畫骨始覺韓幹非良工古來
尤物無常主發厨一日煙雲空明珠棄閭吁可惜母甯讀畫
台飢窮高齋目想若有見渥注靈氣來空中

桑乾

垂虹如月臥桑乾獨客臨流擁玉鞍駿馬嘶風驕不渡一時
回首望長安

感懷呈陶

在銘

仲彝四兄

題柱功名感逝波擊壺聊復助悲歌他鄉見月國藥少好友
如雲聚散多愿愿春鶯繞苑栖栖羸馬又交河中宵漫蹠
劉琨起歸夢依依在綠蘿

白燕二首贈諸可翁 遲鞠同年

珠簾十二映瑤臺，宜主新妝淡愈佳。舊壘似含瑤島雪，前身

曾上玉人釵，難爲海客瓊瑤報。

君詩先成

且喫盧家玳瑁齋，寫人

生綃白團扇，霜豪輕點粉輕描。

時索君畫扇，即圖白燕於上。

非鷺非鷗太瘦生，美於雪鷓小於鴛。曾巢玉署痕難掃，不見

梅花恨也平。拂水乍疑雙屬玉，步虛何止一飛瓊。烏衣子弟

皆才俊，但見珣珉眼倍明。

兼謂肖菊五兄

新製布衣

釋褐猶無日，安論紫與緋。檀花賣女布，薜荔楚人衣。澹泊從

吾好，逍涼與汝依。世皆同此服，愁絕錦坊機。

仲彝見示令弟子珍同年金麈詞題後

樓臺七寶太玲瓏，金碧檀欒語自工。入樂當爲玉方響，在花

應諡錦薰籠紫雲曲奏諸天上絳雪丹成九轉中記否玉田
傳聖解好教質實變清空

枝江

春江急水下輕橈隱隱孤城聳麗譙一夜桃花落如雨劉郎
浦口自春潮

由沙頭至了角廂卽事二首

孤榜逢春雨溪山覺曉寒桃花礙樵路野水上魚竿青鬢愁
中薄春衣雪後單芳梅久蘼落弭棹采紅蕖

曳纜遶春濤開帆帶晚霞杳然望中泚三兩住漁家歲儉炊
菰米田荒長蕨芽女兒浣紗去愁對白蘋花

潛江講舍題壁

廢院經時長綠苔兩齋寂寞野花開琴書草草成流寓詞賦

寥寥想異才板屋秋風入獨廡草堂春雨燕重來依然郢樹
青如薺一日離腸定幾回

抵家

日夕始見塔到門山月低老親起逆我顧我顏色悽照以燈
燭光憔悴無容儀哀樂能傷人况我常羈棲譬如歸甯女慰
問非一詞暈勉事他人安及爺孃慈區區愛憐心十倍未嫁
時又恐無久淹還當成別離甘滑適兒口寒煖試兒衣宛宛
姊妹行誰云是男兒繫余事遠游豈曰儔侶稀至竟骨肉恩
難爲朋好移短褐苟蔽身菽水甘如飴吾將掩衡門又虞獲
鶴飢

德安試院聽陳太守建侯談風穴之勝有懷孫彥清德

同年汝州

生平結志歸林邱，飢馱往往依賓幃。而月閉置如新婦，雙屐坐負名山游。漢東太守真名士，南北經行三萬里。酒酣爲我說中州，嵩洛清光落杯底。少年帶劍出幽燕，開府荆梁正禮賢。爭知夕殿含香客，來詠清秋宿府篇。黃皮袴褶桓宣武，馬上英風健于虎。汝南駐兵一月餘，營外青山似環堵。一峯突起，豎天旌。上有空同舊日銘，玉帶河邊朝洗馬。翠嵐亭畔夜呼鷹，萬松夾路蒼髯古。六月山中不知暑，黃塵一騎去如飛。刷耳虛濤走風雨，松陰盡處是紅牆。來叩生公舊講堂，一邱一壑平生願。肯與山僧話戰場，十年陳夢消無跡。坐想煙霞猶歷歷，胸中五嶽一傾吐。慰我多年山水癖，卻憶風流孫會稽。凌秋獨上小峨眉，梁園賓從皆零落。苦被山靈索賦詩，時以游嵩山及小峨眉詩見寄

宿魚網洪

明河耿遙夜獨客詠涼天
旅袂西風裏鄉書白露前
猿歸樵徑月鐘定竹樓煙
欲趁秋江曉寒裳採白蓮

晚步隄上

西風吹短鬢筇笠鎮蕭閒
織月依楓樹孤雲貌白鷗
偶臨秋水畔時見釣人還
夙有濠梁興因之憶故關

秋夜同索生煮茶

屋山月上霜滿庭虛廊謾謾
風葉爭明鐙緙閣澹相對菊枝
墮影當秋屏夜寒讀書宜得飲
起吹活火安銅瓶我力豈能
致官焙薄有草茗聊慰情篋中
羽扇久封置此時功與寒蟻
并乍見金蛇出復沒旋聽
蚯蚓嚶嚶鳴斯須點出更芳冽
露芽淺碧花蠶青潛人點茶入
鹽豉庸知清濁須分明佛苧甘

菊以類至心脾無事常和平語生慎莫用齷齪此君高潔非
虛名獨憐飲多每破睡中宵望月心屏營起尋破硯頌森伯
詩骨當與寒泉清

至鄂州呈外舅彭

汝琮

器之觀察二首

軍門長揖挂冠行一舸秋風逐季鷹東第角巾歸最早中山
書篋訪無憑勳名抑塞頻看鏡時事艱難每拊膺欲復漢家
鹽鐵利豈伊博士致中興

藥肆逢公淚滿巾十年淪落受知人辛家樓畔游如昨漫叟
湖邊跡較親鮎竹功名慳尺寸齋鹽心事話酸辛北征銷盡
輪蹄鐵爭及寒溪理釣綸

冬日山行絕句

雪地敲門借火烘松皮燒火芋魁紅行人爭及田家樂細布

香秣過一冬

咽咽臘鼓關冬晴蘆菹生兒半帶英歲晚家家接新婦紅薑
紫菜稱調羹

老圃霜濃菜甲肥瓦盆盛雪凍黎祁一蔬一飯皆真味移入
官廚便不宜

牧兒生小住山家冬學閒時樂事除雪後不知溪路斷倒騎
牛背看梅花

雪路旁連板木谿家家插竹補煙籬山中不識魚鰕貴伏弩
寒林射果狸

路轉峯迴十八灣兩山狹處水潺潺旅人亦有還家夢不出
丹崖翠嶂間

陰巖雪水下鄰馬汗如霜凍滿身多少居民窮谷裏不知

人世有陽春

露凝霜橋取次看
冰天袴褶不離鞍
何須更飲長城馬
才向人間說苦寒

陶七 在竟 隸書歌

今人學書宗北魏
刻鵠畫虎多失真
目中曾未識漢隸
譬飲河水忘崑崙
陶生晚出秉微尚
參校三體追虞秦
中郎石經久淋炙
至今乃復有虎賁
三年不見見轉訝
意氣落落空人羣
剡藤徑丈墨盈斗
管城寸地生風雲
臘雪打窗大于掌
解衣磅礴迴春溫
凝神聚氣若有待
眼光注視愁鷹隼
胸中槎枿森欲發
落筆坐令蛟龍奔
興酣往往得天趣
但視其字知其人
自言臨池無寒暑
被中畫肚役精魂
壞牆日練五千字
盡一盃水忘朝昏
霽天十日雨不止
四壁突出雲雷文
乃知

萬事無逸取傳之縑素須精神灑廬主人擅墨妙

謂令兄子
珍同年

僧彌法護難爲分君若論文當師事獨有隸草皆絕倫嗟嗟
世人貪耳食布衣則賤科目尊王褒數字競相市庸知世有
洪亭民君書何必晚乃善傑立已足張一軍卽言倘許作噉
矢願持此紙懸國門

除夜與姊妹侍家母作寒具作

忽覺歲曄嶮春堂炳華燭比屋照虛耗千門難爆竹慈母未
卽臥爲兒具旨蓄英粉屑銀泥井華漑山藪鏤爲玉葉工糝
以脂花馥我時衣領鼻就取鑪頭煥日炊一云選椒頌久無
復以身奉榮區猶勝膠竝續阿姊况明惠有妹皆婉淑頗能
製羹湯豈惟具茶粥茲夕百無事遂有紅綾祝熱嫩一以翻
煎香達鄰屋捧觴爲母壽佐此杯中醪嘉客詰旦來慎莫污

畫軸

送人赴襄陽

漢水東流去西行欲斷魂江山三楚盡耆舊幾人存有淚思
羊傳無家住鹿門花時一爲別寂寞負清樽

寄譚仲修

廷獻

同年杭州

渴來支枕夢西湖白舫青簾入畫初衡嶽春迴三兩雁辛夷
花發數行書故人東望思魚膾名士多年尙草廬爲憶南屏
山色好老坡笠屐定何如

將至郢上先以一詩投施大望雲

標格曾聽說項斯賦風歌雪久相思坐麾麈尾傾江表手握
芳蘭讀楚詞鷓鴣鳴時津樹暗棟花落後峭帆遲蘭臺賓客
今餘幾接迹千秋未可知

安陸試院有懷孝達師都門

雪爪重尋歲已遷，巢痕歷歷記當年。
懷中香草堪誰贈，爨後焦桐祇自憐。
南國賦才今已矣，荒臺明月尚依然。
東來未合千劉表，英識真慙杜穎川。

玉尺親從使者操，曲江席上憶揮毫。
春來江漢流何遠，地隔蓬萊望已高。
絲竹自憐疏絳帳，輶軒猶盼出詞曹。
豐臺花發金樽淺，撰杖空餘夢想勞。

舟次郢上寄別施大望雲謝五朝徵偶樵

郡閣一尊酒，臨觴意有餘。
言辭石城去，惜與故人疏。
落日天門樹，寒煙夢澤漁。
停雲不可見，楚望渺愁余。

潛江雜詩十六首

淼淼平湖五月秋，外湖水入裏湖流。
頭銜合署青溪長，問字

亭邊有釣舟

肉食堪憐骨相乖，閉門旬日學清齋。
江鄉四月初生筍，強飯須逢謝豹來。

十畝回塘歲有租，閒時留客飯秋菰。
湖田薑蔗年來薄，更課

山僮種紫蘇

滌人以鹽漬紫蘇佐饋味極清美

羹湯酷愛吳兒製，黃蜺青螺別樣甘。
爲底居人工畷，蚪甘鬆渾不似江南。

白鶴樓中四面窗，白鶴樓下清溪長。
田田盡種青荷葉，十里風來併是香。

女兒垂髮采雕胡，愛弄輕舟引白鳧。
聞說石城工盪漿，一時

疑望莫愁湖

石城女子盪舟獨異相傳是與獻王妃所敬

妾家三板橋頭住，郎住青谿一里強。
驗取湖中新種藕，聰明

肯信不如郎

馬場湖東爲三板橋
相傳湖中藕多一孔

戴勝飛時紫萼勻錦坊愁煞
質絲人飛花盡織丁娘布
春綃秋羅不稱身

細布綵纈五色齊寒房
刀尺思依依紅藍與作合
歡被魚白還縫游子衣

雨蓋輕於出水荷垂簷
面面翦青羅琵琶飯甑君
休笑入市

無如傘戶多

潛人多造傘者
俗呼傘爲雨蓋

城北城南一里餘踏莎來
就子雲居岐亭監稅風流
在不遇

東坡亦借書

城北萬氏
藏書頗富

桂樹秋分始著花山房清曉
拓窗紗淮南招隱何人會
祇有

城西處士家

城西董桂山房
爲吳孝廉故居

薄薄城南二頭田青鷓白鷺
鏡中天一年一度桃花水
苦累

兒家買釣船

潛江歲有水患比戶多置舟楫備潦

建磯歲歲渾無力挽月年年亦未成生把金錢擲流水不堪

頻聽打碓聲

客舍經秋復歷冬讀書常得兩生從荒臺寂歷雙龕火律院

森沈幾度鐘

講舍東偏爲說詩臺甘棠二生讀書處

前輩風流手蹟眞探花澹墨想丰神祇今蕭寺梁間月合與

蘭亭一樣珍

城北法雲律院爲王夢樓先生流寓處寺中手蹟甚夥

湖上一首

三板橋西路人家對夕暉渚蓮風定落江燕雨餘飛水曲每

孤往意行仍獨歸年年狎漚鳥所得是忘機

戲題近人詩集示及門諸子

采蘭莫采葉食筍莫食竹啜酒莫啜醅扣鐘莫扣木羚羊詩

境何處尋在辨芳新與癡濁夫夫自擬古作者牛腰詩卷森
成束戈矛鏽涇充武庫羹馘種疊來光祿竹林中人走且驚
愛伯師嘗謂余曰此人要當決絕耳曹洞下禪叅未足亦知我語勝渠語愛玩
生紅映新綠捉筆欲寫杜鵑心其奈漢唐相追逐

別甘生索生

商飈入庭樹松桂凝清陰諸生鶩省闈余亦歸故林結璘炳
遙夕圓魄忽已侵豈有寄生枝永焉同一岑摻社亦無言各
各沾衣襟臨當渡河水一再爲鼓琴琴心一何悲流水一何
深庶幾千里遠猶聞絃上音

潛人故貧瘠十脰僅能具置魚嬰盎中豈有江湖趣既傷游
子懷更深烏鳥暮鬱鬱久居此徒以二生故籩豆摘秋英庭
蕪改春步仰視高天雲遙知倚闥處桑梓不可忘他山匪子

助努力愛春華相期保歲暮

甘生好讀書萬事坐捐去
戎我幾五年相從問奇字
羈鷹息六翮豈忘凌霄志
言飛鄂渚颿行總春明
轡長安十二門縱橫
通車騎安知契闊懷
不以驟斬易獨念
索生貧孌孌在苦
次今茲舍汝歸我思將焉置

良時每虛度臨別始見珍
炳燭黯相對無言坐
達晨出門望天表
歷歷見星辰駕言過
湖口瀕湖多居人
裹頭起相送貌蹇
意逾真三年此棲託
衢路成交親矧茲
嚶鳴友執手安可
論漢水回文波舉網
多織鱗爲將尺素來
慨釜勿厭頻

寄獻孝達夫子典試蜀中

流星四出閭闔開
繡衣持節西南來
益州使者發京邑
碧雞金馬生光輝
神武中興翦妖孽
曠吞海內收羣策
漢廷最賞

凌雲賦蜀國至今有餘烈先生盛名冠朝右奉使西行簡英
傑車蓋晨飛隴首雲馬頭晝隴峨岫雪錦官城闕鬱崑崙鷹
隼上擊秋天高鎖廳三試奇傑出遺棄榛艾存芳椒朱書細
字一萬卷夜半目力窮秋毫爾來制藝實薄劣內無骨幹矜
皮毛其餘經策等兒戲捃摭故紙慙虛枵先生取士獨不爾
多方詰難形爲勞十條畢對居上第貢之天府輝球刀憶昔
星輶臨越甸祥金美竹搜求徧名士同登有道科門生多直
承明殿今來蜀中秉衡尺歐門軾轍應重見試望天彭井絡
閒奎躔如月中宵煥八月槎迴楚樹秋岷江千里渺東流若
從巴峽穿巫峽至喜亭邊待艤舟

重陽後一日過萬年寺

秋氣入叢薄幽棲駐晚芳寒潭生菊草細雨過僧房極眺平

燕遠西風短帽涼瓦盆昨無酒佳節負重陽

送吳秀才落解還山

明發挂帆去蒼蒼楓樹林秋風易搖落吾道有升沈
彝水雲初合房陵雪漸深空山產文梓勿改歲寒心

風城遇雪宿許旌陽廡

老僧留客借禪床積素樓臺未覺荒照夜香燈還獨對
隨緣茗粥且同嘗龍蛇突兀生虛壁鐘鼓清新出上方
月到中天諸品靜魚山清梵可能忘

寺中見琴道人畫輒題殿壁

道人姓張吳江人家君官宜昌游擊嘗客署中垂三
十年矣

不見東吳老畫師苔皴粉剝見花枝忍寒出手凍於鐵秉燭

西廊來賦詩

官闕無因更舉觴
邊鸞道墨滿宮牆
蒲團一夜涼如水
不似西陵舊射堂

卷一終

樊山集卷二

恩施樊增祥嘉父

雲門初集下

起甲戌
訖乙亥

公車一首贈陳陶二子

時在大
梁旅次

公車待詔詣明光
廣術縱橫服乘黃
梁苑雪深還寂寞
中嵩雲起盡飛揚
春風有力舒桃李
秋水無何貢玉堂
聞道建章增舊制
可無詞客賦長楊

西平道中

側帽東風裏
聊爲擁鼻吟
高原初秀麥
芳樹漸鳴禽
桐柏春流合
吳房暮雨深
應憐鄖城月
不照別離心

鄴城懷古

拓跋東遷事事非
高王龍種出鮮卑
再傳玷甃終移祚
六鎮

風雲此誓師功德韓陵元不朽
淒涼勅勒至今悲
清河照盡南來雁
貴主凋弓恰付誰

方順橋題壁

水店荒寒柳未絲
春袍無奈北風欺
暖簾不捲燈熏晝
破壁重泥粉蓋詩
河朔健兒猶帶劍
牆東羅袖解彈詞
好將姓字題橋柱
驗取相如馬過時

月夜

月出挂林表
勞人殊未閒
在天有弦朔
滿地盡關山
霜雪生明鏡
常儀獨玉顏
青青此桂樹
乞許種人間

入都呈李

慈銘

愛伯先生

郎官平揖對三台
朝論多聞惜此才
積雨掩關塵夢少
幽禽啼竹好春來
明時獻賦趨金馬
花下緝書檢玉杯
爭怪故山

猿鶴怨獨因紅藥戀豐臺

奉贈陶方琦子珍六兄

綠衣白面好年華，廣座猶能識孟嘉。
想見每從春殿柳相逢，剛及帝城花枕函。
日記添新本，麈尾風流屬舊家。
甃得爲雲逐龍去，未妨迢遞是天涯。

法源寺看花和子珍韻

宣南二月多春風，軟裘始卸貂狐豐。
閉門十日卧碣館，頽牆

瞥見山薑紅客言，古寺花更好龍樹。
寺名以北蓮華寺名東攬衣

出門約朋好孫請彥陶仲彛子蹶起羣相從，擔花輦水過如

織柳絲十丈，縈青驄鳴鞭擊轂轉狹巷。
白沙如砥青槐濃，入

門鶴睡猶未醒，石壇細草煙茸茸。
踏莎一徑入深院，粉蝶下

上追黃蜂嬌棠十本如欲語，深蘋暈頰回春慵。
丁香垂垂亦

漸坼晴絲胃樹紛游潑顏色美好天所眷輕陰暝靄棲芳叢
花光遠出尋丈外回身卻立丹霞中道人肅客具茗果意態
清遠疑琴聰龕花瓶拂安位置經魚茶板消塵容我居長安
近旬月籠頭席帽黃埃封禪闕半日肆幽討頓令顧視開層
雲清泉活火煮春焙一呷已足澆煩胃講經爲招千歲鶴脫
幘卽挂前朝松眼前萬物盡開曠下方擾擾何由逢願禽漸
歸吾亦去隱隱花外鳴昏鐘

同仲彝子珍昆季過越履堂飲紫藤花下作歌呈李愛

伯文

長安十日夜三醉九達坊拂黃塵滿畫轂如流紫陌長垂楊
踈地青春短平生讀書志淵默姓字甯須要人識越履先生
朝隱流升堂特許瞻顏色著書閉戶還寂寥誰與從者唯二

陶看花每約同車。出置酒頻煩。折簡招失喜，今朝風日好，款
段同尋。鐵門道入，門花竹交清，森古書素琴悅。懷抱紅藤一
架陰。四垂纖條密葉，含英蕤頰。怪虬龍落窗，厲頓鸞瓔瑤滿。
春衣從容留客具，杯罈呼僮行。夾當花下，金樽羽爵一再行。
衫上落英，浩盈把長安鼎鼎，多貴人長筵。廣席開入珍笙歌
肯逐。時人好風雅，終期我輩存。主人卻坐思鄉，縣東望稽山。
渺含歎。菰菜蒹蕪，幾度違櫻桃竹筍。尋常薦藪，執戟多年侍漢
廷。手遮方麴，避公卿起居時。復驚朝貴樂府，惟應付妙伶。越
禽未歸，燕草綠眼前，且可相追逐。爲約明朝，辦裏糧。撻雲往
踐西山麓。

陶雋尹席上留別子珍

鈿帶筵篔夢已醒。門前垂柳卽離亭。瀟瀟暮雨吳儂曲，祇好

花前一度聽

出都

客去高樓酒尙溫
淋漓清淚互衣痕
馬頭一片長安月
照過蘆溝總斷魂

天津

花絮飛時別鳳城
參差金雁泣秦箏
無情最是津門柳
更送行人海上行

同仲葵陳汝翼伯雙昆季飲滬上酒樓有懷秦勉鉅丈
渺渺吳淞入海流
故人同駐木蘭舟
江南花落相逢短
爲典春衣上酒樓

風流淮海擅壇詞
嫩約青牋惜後期

大甫於三日前歸去

一抹微雲山

色裏輕帆想見渡江時

金陵五首

鬱鬱鍾山王氣收，昔人曾此作金甌。
雞鳴無復稱天闕，虎踞空煩拆石頭。
十廟穹碑俱宿草，大橋懸纜尙中流。
百年興廢誰能問，粉堞笳聲起暮愁。

百粵傳烽照洞庭，武昌蟻子亦縱橫。
豈聞鐵鎖防江表，遽報戈船指石城。
留守空憐宗澤卧，尙書長愧褚淵生。
塗膏十載無乾土，棖觸江東父老情。

幕府山頭久合圍，將軍天上錦帆飛。
三交俄見蛇矛失，百戰空憑馬革歸。
彤駿忌才援蚤斷，琨礪戮力願終違。
江淮草木今猶震，何況遺民淚滿衣。

桓桓鈔鉞起湘中，九道環攻節度同。
奉詔視師諸將肅，殲渠埽穴一朝空。
運營盡聚金銀氣，五等應酬汗馬功。
好向雲

臺瞻畫像未勞廣武嘆英雄

野消兵氣煖消煙井社荆榛劇可憐琴塵已亡前輩物衣冠
重親中興年名流競置新亭酒幕府催耕白下田蓆帽東來
無遠志冶城登眺轉悠然

偶樵爲張樵野觀察作郎官舂泛圖屬題

使君花底唱騶回對閣參差列嶂開欲試煙波亭下水自携
瓢笠渡江來

供奉來游跡已陳流觴重泛碧湖春山靈不識何官府天寶
而還第二人

一帶花林雨歇初畫中髣髴見精廬荒烟如夢楊花晚寂寞

青山謝朓居

卷中湖樓一角爲偶樵讀書處
荒煙如夢楊花吹老其詞句也

會記歸舟泊漢南強携蠻榼眺晴川柳絲荷蓋垂垂老五月

陂塘水接天

奉贈倪

文蔚

豹岑太守

形勝西南踞上游

帝諮循吏領荊州

陶侃

桓桓

桓溫

才望今誰匹
屈宋文章倘

可求蘭芷芳馨尋故苑
魚龍寂寞偃清秋
爲君更上金隄望
無恙岷江日夜流

寄子珍京師十首

神交異楚越
獻稿始賢兄

謂仲

名字常挂口
相從無翅翎
卻

顧蓋篋中素書積已盈
今年春風發
脂轄游神京
相見稠人中
直前呼其名
滿堂盡愕眙
吾乃喜懼并
喜茲驟
斬合相逐
猶影形懼復有他
離悽惻安可勝

中歲始相見
結交常恨遲
後約雖云長
安能補前期相逢及

春半名卉開辛夷忽復含桃實京洛改春衣朝夕縱所如璇
官或琳池荒耽亦有戒爲樂懼無時及今魂夢間歷歷猶可
追平生賞心處茲游其庶幾

良游固云美茲心百無競閉關人海中道悅與禪定往悟幸
可質來奇迭相贈異書與名友相依互爲命羣流鶩纓冕翹
翹望車乘桃李詎不芳貞松有本性

桑弧設門左所志在四方顧茲反哺義能勿藝稻梁各各念
門間時時懷梓桑願言獲鼎烹再拜陳高堂北來春風惡花
落還故鄉君子固長貧胡爲氣不揚毋乃養不足怒焉使心
傷

之子戀京邑我駕將言旋明知有乖離相戒勿復言十日何
所事飲酒約平原客醉未能起驪駒忽在門送我及門限視

我登輶軒淚眼不忍開但道珍重頻雙輪入馬蹄絕塵去若
奔知君千里心輾轉隨車輪

駢馬出國門心旌長如懸觸物遂成泣撫衷多憂煎密密眞
珠字煩君寫齊秋灑灑翻酒痕漬我衣袂間瑣細及茶果一
一車箱安意防行子饑覩茲翻輶餐行行及日晚靈雨滋高
原母乃感穹蒼垂泣助汎瀾不憂巾履濡祇畏衣裝寒雨止
固有時淚落無由乾

舍車登夷舶涉險望蓬萊巨海揚鴻波萬象森在懷赤雲翼
白日下照金銀臺乘螭時出沒浮邱及洪崖側見之采山天
際何崔嵬雄視區宇內仰觀秦漢來吾欲銘其巔浩蕩思君
才

三日達滬濱艤舟當海岸開眸見江光空明展秋練隔江望

越山是君舊鄉縣欲濟阻重深諸昆無由見

謂栗園諸君

江南四

五月落英滿芳甸遠山旣明麗密林逾葱蒨撫景易爲娛綠情獨含嘆北獨思故人歸心渺江漢

方舟溯江漢輾轉歸里門賢兄與扶持萬里同苦辛倚閭久延望見我喜笑頻不復言失得細數交游新君才及行誼一難具陳家人已倦聽吾意殊未申逝誦杜陵詩永爲結弟昆

端居懷永念尺素忽相貽省書未及竟零涕沾裳衣上言夙疾發下言長相思是夜夢見君面目滋清羸相顧雜悲喜不知何言辭念茲三載別猶若百憂羅翻憂孰後死慘慟安能持願言服丹砂千載以爲期

奉贈彭方伯丈卽題其所著賜龍堂集

顯皇策士開金馬襴幘爭趨赤墀下海內潘

伯寅楊漢石並侍郎學士

盛名龍頭一日歸江夏風到神山卻引回景文之遇古來寡

王子廷對丈已入首選改置第四

豈知

帝眷益深厚名字獨邀御屏寫憶昔承明入直時靈和前殿

柳如絲姚崇望重乘金輦劉蕡資輕入鳳池十色宮花簪鬢

晚

丈登第已四十

兩行蓮炬送歸遲似聞

天子親調藥屢被中官索賦詩玉堂清畫花如霰內使傳呼

侍春醺玉袖昭儀喚捲簾

至尊含笑蓬萊殿上苑芳花取次看天廚果菜嘗應徧昨進

宜春帖子詞坐令東馬文皆賤九重手詔催賜金擎出端門

萬人羨一朝銜命出長安玉尺親提入太原

帝倚鄭崇心似水士尊韓愈望如山五臺樹翠當衙臨三晉

風雲立馬看，祇恐夜深前席對。漢文欲見賈生難，萬事倉皇由北狩。紛紛麴索工招寇，海上鯨鯢跋浪來。津門一戰師期漏，車駕傳聞幸奉天。小臣痛哭羈山右，淒絕淋鈴一曲歌中宵。雨泣朝衣透，乾坤再造中興局。使者還朝蒙省錄，玉露金莖事已非。秋風獨嚮

原陵哭，是時回紇寇滇海，烽火西侵動巴蜀。朝命連催祀碧雞，故山那許歸黃鵠。迢遞單車出帝京，西來焚道阻連營。丹心翻有三邊戍，畫篋能輕萬里行。參軍競美荀文若，傲物甯同禰正平。直蘭城上清秋月，單照孤臣白髮生。可憐枳棘棲鸞鳳，回頭未斷金閨夢。枕上聞雞憶早朝，鬢中騎象思春貢。諫宦原非

聖主心，輕裝尙是詞臣俸。賜物多年不忍看，開箱蠶粉增悲

痛苦憶家山雪涕漣金江淫潦跼飛鷲尙稽孟獲成禽日已
是陶潛解印年洱海氛來請將在昆明劫重道人嘆盡收六
詔風雲氣換取沙頭一釣船

先皇一日猶臨馭肯令先生避人世自是中朝老大臣終教
敷歷清華地千秋龍去鼎湖空橋陵弓劍皆遺棄魏闕終無
起廢書江湖空下憂時淚我有衰親鬢總皤當年百粵挽天
戈入朝屢得

天顏喜三接頻看晝日多祇因左右明珠謗淪落人間馬伏
波若遇高皇思猛士忍教猿臂嘆蹉跎太息繁華如轉轂先
生更悵炎荒逐在日鴛鴻侍上清只今鷗鷺翻相熟兩朝遭
際不復言賴有詩篇與人讀畫筆猶工澤畔蘭晚香且種籬
邊菊殘月觚棱夢已空角巾東路早歸農山中袖卻爲霖手

昔日天章枉賜龍

江陵感秋寄遲菊仲彝

池館黯將夕元雲薄未開秋
桑原上落江雁雨中來亦有芳
華怨遙憐二子才離居苦蕭
瑟含睇楚王臺

次韻答彥清見寄

彥清將由汝州還越期以九月會于鄂渚

鑑曲鱸魚秋正肥
遙聞孫楚整駉駉
異鄉又近重陽節
遲我同登黃鶴磯
雲起崆峒常北望
雁來江渚更南飛
故人晚卧龍山下
鼓舵相從願恐違

次韻和蔭田江樓晚眺

高樓俯清漢極眺入雲間
眾鳥飛將歇孤鴻迴未還
明波秋盡柳深黛
雨餘山白日亭臯
暮因風想佩環

齊居卽事

已斷春明夢，閒吟秋水篇。荒庭生短菊，甘井汲寒泉。才薄逢時拙，情孤得地偏。元蟬今已寂，吾鬢尙依然。

奉答張預子虞同年見寄二首

與子結交始羊年，月建辰奄忽遂三稔。邈近京華春驅車上，脩阪鳴佩入重闈。赤霞麗層霄，光采何紛綸。華裾綴龍輔，結響復璘幽。英情懷遠志，所貴非多文。枉矢東南流，矯首憂夷氛。纓綬滿朝右，之子歸桑粉。湛盧號越產，和璞亦荆珍。無能離蔬屨，懷寶何絲陳。

神京天下會，紫極麗我我。自非遺世人，曠能遵巖阿。直以門閭望，睨焉歸薜蘿。君歸謀潔養，藝蘭已成科。我歸行負米，奈此瓶罍何。書來當九月，峽口生微波。舉網得雙鯉，溉之於江沱。一以奉親舍，庶幾餐飯加。一以報故人，勉旃勿蹉跎。

爲蒯明府題墨梅帳額

蒯侯愛梅今林逋美人婉孌棲房隅松枝麈尾竹如意宜稱
惟有雁仙臞爲言先世亦愛此寫之縑素供清娛橫枝百本
頗有餘幅幅姿態相差殊叢篁綺石並妍妙南樓家法今則
無君遵先好爲此圖縹帳一夕春雲敷好留明月照顏色還
疑舞雪迴衣裾家山被兵近十稔江南舊宅生春蕪水邊籬
落自閒靜苔柯斂倒無人扶近聞花時盛游醺煙霜迨隔終
模糊清宵飛夢去江表一訊鄧尉今何如

謝五少尉所畫山水障歌

南陽畫隱冰道人荆關墨妙疑有神

請蒯三十五

同時小謝亦秀

出落筆一笑江山春白日空堂展秋練沓嶂迴峯露眞面一
室俄驚林木昏終朝祇覺陰晴變素波渺渺江中流更無一

舸橫清秋望中煙樹不可極
鳧雁歷亂迴汀洲君家遙遙隔
南海手掇江離今幾載
兩山風雨望離合七澤丹青發
光采爾來八嶺苦于役
翠竹夾江干嶂碧沈思畫理
忽有會驅染煙雲障猶濕
徐生寶此莫輕棄匹練已足
兼金直古人五嶽可卧游
起視虛嵐滿牀席

同郭大秀才謝五少尉登荆州城樓遂至城西蕭寺晚
就謝五小飲分韻得間字

詞客飄零久未還
登樓獻侶一開顏
秋生原野蒼茫外
望極峯巒紫翠間
苦茗暫尋蕭寺話
明燈同對郡齋閒
樽彝便擬南皮醺
此樂天公獨未慳

發了角驛望荆州作

渚宮琴鳥屢相違
歲晚鄉心欲奮飛
岸柳漸侵春令發
江鴻

多是雪中歸風煙漠漠開平楚城闕依依帶落暉總爲諸侯
愛賓客賴令歲月誤征騏

題戴文節公嶺南貢果品物圖

嘉道以來畫山水澹逸獨數文節公有時傅色肖珍果鮮新
竟與枝上同輪囷觸手疑可飭碧筋鈎染肌膚紅細觀卻非
中夏產異物遠自浮邱東侍郎前後三乘傳合浦清流久安
宴紫貝明犀昔所珍黃蕉丹荔今親見炎風吹樹百果熟星
馳貢入南薰殿祇覺東吳橘柚粗坐令西域蒲桃賤公之此
圖特精好稽含草木開生面自從粵氛阻江表秦陀舊地荒
耕戰萬里珠崖水遞遲宸園寂寞虛春薦侍郎騎箕桑海移
百年再睹中興時上林猶自蕃盧橘置驛從教罷荔支古來
遠物信非寶王者口腹甯自私願持此圖作金鑑勿勞貢從

陳丹墀

陶七弟居室雅潔賦贈一首

掃地焚香掩畫屏
瓶花硯水各芳馨
纖鉤漾玉螭
蟬碧細火
宣醴鶉鴿青
朝士自肥丁
度瘦世人皆醉屈
原醒我來又值
西窗雨好泛紅螺
翦燭聽

送程巖伯游蜀

出門西笑望峨岷
華髮蕭然岸角巾
雪水乍消三峽路
風流應是六朝人
芥茶青子常供客
塵尾焦琴不去身
認取米家書畫舫
文虹中夜落江濱

寄杜仲丹明經

驚聞前輩失南屏
杜老東來見典型
爲客乍添雙鬢白
讀書曾對九峯青
殘霞遠雁迷春渚
斜日江蘼映晚汀
欲采芳馨

向何處不堪瑤瑟怨湘靈

同陶七騎尉過天皇寺觀飛來佛像

一徑入深碧開門響石泉行憐幽草色坐嘯古松前靜鳥窺

僧飯春犁閣寺田畫圖肅瞻拜靈蹟故依然寺舊有張僧繇畫孔子及七十

二賢像今臨本尚在

傳聞典午日有佛自東來玉殿仍花雨檀林幾劫劫灰妙香堂

下柏殘碣古時苔客有清芬慕覃思亦費才寺中碑記爲騎尉十一世從祖

守荊州時撰書刻石

寄懷房師朱荻舫先生監利時新自郡城回縣

郡閣深談每夜分春風相送楚江濱養親暫捧求官檄判事

都成壽世文鏡裏烏紗秋浦玉手中團扇敬亭雲河陽亦有

花千樹桃李終憐舊日芬

倪荊州新畫山水行障爲施大賦

芙蓉十二生屏几亭亭坐見青霞起舉頭明月在高峯捲幔
驚風動江水使君善畫得畫理雲林家法毋乃是政暇跌宕
弄煙墨南樓山色交清綺虛堂五月思衣裘蕭蕭竹柏環清
秋飛崖直下一千尺湧起丹翠開層樓橋梁俯視知無地杖
藜一客耽清泌熱惱全無纓冕情蕭閒始識林泉意君家近
對匡廬峯西南秀色多葱蘢金光絳氣入房戶卧聞瀑布鳴
天風我生篤志愛林壑五嶽劣已窺衡嵩朝來讀畫不忍釋
游目悅與廬山逢施君好道師辟穀誅茅擬結山中屋石梁
老翁不避人飲爾玉漿須一斛

寄彥清子珍書題後

南館聞箏夢已非當歌稀復御尊疊春光雪後迴燕草獨客

江邊寄楚梅源倒每多京國思交期難盡越中才會看待詔
承明日懷抱因君得好開

初夏苦雨適子珍以雨中感懷詩見寄因次其韻

重簾不捲藥煙微積雨空堂乳燕飛檻外輕雲時掩冉夢中
芳草尙依稀熏爐莫遣春衣薄明鏡深愁玉貌非荀老蘭長
生事嗇讀書聊可禦朝飢

寄仲夔

我憶君如白與元每將閒事報郵箋野花開入臨江宅細雨
寒生五月天弟子更多巾卷會時人肯乞草堂錢軟裘快馬
春明路無復心情似舊年

緬甸貢象歌

毅皇中興神武姿雲臺列宿爭驅馳埽清六合見日月梭威

遠怖西南夷累朝恭儉踰唐宋靈禽瑤珥知何用千里無勞
汗血來炎方詔罷明珠貢獨有鳴鐘動天闕端門馴象森成
列林邑當年入貢時銀鞍赤鬪真殊絕水草頻經內苑春毛
膚老作西山雪立仗通明二十年玉河照影嗟衰鬻前年南
越震

天威蠻奴騎象來逶迤鞞輶垂鼻致闕下始覺鹵簿生光輝
緬人懸結阻滇海毒草金鱗春不改望氣遙知有聖人碧雞
金馬神光在國中育象五百匹游牧川原騁奇逸每以春秋
教耕戰直令虎豹慚毛質國君呼象與象語汝往天朝定
官汝三品應能飽芻豆百年莫復思鄉土就中七象頻點頭
別羣灑泣從其會漏天淫雨迷邛笮十月炎風渡憂鳩六牙
欵塞滇中駐鼎湖弓劍驚非故雪裏如聞鶴語悲日南殊切

龍髯慕

堯舜欣聞在掖庭蠻中舞獸還爭赴湘水如浮雪嶺來黃流
不待堅冰渡雕題此去朝明光豐觚酌酒調笙簧褚衣歸遺
天家物玉帶遙頒異姓王前年象入黃山苑七象今來喜相
見立向金鋪那可分賜來法酒羣相勸出浴爭翻太液波經
行似掣吳門練萬眾天街仰面看纖離騏驎誰能羨遠人歸
去百蠻中爲述天語宣皇風冠裳漸解思中土膜拜猶能祝
兩宮久已桄榔成互市更拋鋤鼓事春農卽看榆澤催耕日
莫論昆明象戰功

和王司馬病起一首

中州盛冰雪人號松柏姿斯士慕吳越質與芳蕙齊流光燦
金石娛樂無恒期一朝嬰美疢分與密親辭苓朮久無功中

肯叩靈祇善人爲國寶神豈無聞知窮陰返丹曜那魄生圓
儀言有更生慶甯忘委蛻思冥心尙玄默道勝貴希夷魁士
秉剛毅豈受世纓縻涼風薄夏簟寒漲生秋池天事有代謝
道情固不移孤生願巖壑獨往逢髡緇悠悠千載心長在東
園芝

漢上錄別追和陳二蔭田

酒盡高樓暮離顏黯夕曛雪中無限柳雁外百重雲嶺表方
饒士扁舟獨憶君隔江更吹笛中夜不堪聞

繫纜芳梅下花時未立春可憐清夜月單照弄珠人歲晏逢
歸羽江寒閣去鱗人閒知己淚無過別時真

題程生所藏徐天池畫冊

文長天下士泥中久蟠螿巨靈一夕闢天池終古神龍尙垂

泣平生三絕詩書畫宛馬昆刀無此快落日千崖猛虎鳴晴
天四壁蒼龍挂中丞愛士宣武流軍門夜入鈴下愁東方千
騎盡勝語葛衣烏巾在上頭白鹿文章小技耳帷帳往往奈
英謀薛公品題世所信沈郎雄快真其儔北走燕齊窮朔漠
周覽通都建萬牛掣筆不可回脫腕欲過雲奔速名流
有時遭譏罵良友力能解桎梏利錐巨斧賊不死嗚呼奇才
天所酷我讀公詩已興起公畫與詩略相似役使造化鑄人
物吐納煙雲範山水青藤被伐池水竭人不知公但視此君
不見聲塵寂絕四百年醉墨淋漓十七紙

泊枝江

朝辭夷陵渡暮與石尤期一雁啼秋水雙楓閣酒旗寒深
外柝吟瘦雨中詩應是離鄉苦扁舟獨去遲

嘉抵江陵城扉闔矣書此貽冰涵望雲

故大期我過南衙繫纜江頭噪暮鴉一別窮秋飛木葉所思
今夕尙兼葭嚴城疊鼓頻侵枕小閣垂燈定有花詰旦相逢
齊拍手百分莫厭酒杯賒

雨後曉行入荊州城作

雨止天氣佳平明躡江步清霜在豐草往往濕行屨危堞已
東峙連峯尙西僂始厯趁晴沙稍深畏寒淤西門多官柳交
枝蔭廣路落葉下寒潭攀條泣芳樹林端初出日原隰猶沮
洳陽鳥一迴薄蒸雲作狂絮高林忽奪翠平疇浩積素蓬蓬
入太虛千尺若連布雖微膚寸功豈乏游衍趣汲汲吾何求
悠悠此行露

九月初七夜大風達曙不寐寄汝翼伯雙昆季

伏枕清吟倏五更蕭蕭落木變秋聲題糕九日知無分斷渡
顛風故不情山寺打鐘寒欲起榜人添纜卧還驚逍遙堂北
今宵雨應有懷人好句成

府河阻風作歌寄陳太守

塔上風鈴語不止日落寒雲爭渡水江湖處處滯檣檝鴻雁
紛紛宿葭葦低篷三尺打頭顛酒醉但卧無須起舊書百讀
欲破碎敝衣重著忘表裏人生三十不稱意萬事多悲了無
喜素絲縱未易垂鬢朽蠹已覺侵牙齒公車三上竟何益箭
塚空懸不著矢歸來局促守章句口嚼菜根曳穿履此態豈
獨世人慢風濤且與相角抵德安太守實人傑幕下往往致
奇士書來邀我校童律豈料孤舟泊江汜食客誰供漢上魚
榜人買貴湘中米明日誓欲舍舟楫馬上折筇當鞭箠相逢

命酒且當歌笑看碧山淨如洗。

乙亥冬寓養園次韻酬器之外舅見贈

名園初醮客忽復六年過。獨客隨來雁。流光逐去波。舊題苔色黯。新酒菊邊多。冠蓋勿相涸。高風懷礪阿。

一昔辭簪組。林居感二毛。諸郎並華妙。老鳳獨翔翔。種樹歌招隱。焚蘭悟反騷。頭陀寺前月。杯酒倘能豪。

登寶通寺塔

歷劫仍崇構。窮高望欲迷。下臨遠地遠。直上與天齊。江漢雙流細。風雲萬象低。夜燈全勝月。晴彩漾招提。

雪中登明遠樓

萬木封條後。危樓獨倚身。江天無過雁。雪澤幾歸人。煙火都無色。風花欲誤春。白雲更西去。延伫爲衰親。

步山集卷二
贈別內弟念棠

倒屣慚爲二謝知，十年重憶館甥時。
已無彩鳳雙飛翼，空有春蠶未盡絲。
花下且携新醞酒，燈前猶誦舊填詞。
扁舟明發丹楓路，烟水蒼茫獨爾思。

漢上阻雪

昨會鼓棹浮雲杜，今見迴帆駐漢陰。
歲暮陰陽爭急景，川塗雨雪迫歸心。
江梅破臘垂垂綻，楓葉禁寒細細吟。
省識倚閭憐望意，嚴風莫向傲裘侵。

舟次晚望

歲暮心多競，方舟去獨遲。
微陽在雪樹，暝色上津旗。
情已江湖倦，身同雁鶩飢。
無勞怨行役，行逐計車馳。

仁懷內弟自蜀中歸省改官浙西賦詩奉贈

彭郎服官未三十五馬前驛指巴夔少年氣岸不下人驕
忽有鹽車泣峨岷遙隔東南望白雲親舍增惆悵黃耳艱難
膝下書鯉魚寂寞春江浪南風六月江怒號瞿塘水急不容
刀扁舟一日下荆郢掉頭不見巫山高歸來嘯歌守環堵萱
花掩映萊衣舞入口依然似昔貧一年始識求官苦男兒豈
必甘風塵下有竹帛上有親毛生捧檄動顏色鄧禹杖策何
嶙峋側聞之江盛冠蓋承平日久崇簪紳棲禽擇木豈無地
鳴嚶求友須及春一篇送子往吳越吾亦公車詣金闕走馬
行看薊苑花回頭卻望錢唐月

留別豹岑太守

南衙兩載與尊鼻吐氣青雲亦快哉陋巷每邀車轍過圍棋
得共府僚陪西來重踐呼鷹地北去言登市駿臺短簿參軍

今並往

兼謂偶
樵少尉

問公懷抱向誰開

別望雲

憔悴詞壇老布衣
荆南重與欵松扉
九江七澤俱能賦
鏡水稽山獨未歸
珠玉滿懷新稿定

時方刊
詩稿

風塵開眼舊人稀
漫因歧路傷離別
夜夜長空見少微

卷二終